

## Kumtukuza Mungu – Msukumo Wetu Mkuu,

*Mpeni Bwana utukufu wa jina lake. Zaburi 29:2.*

**W**ote tunaishi katika kipindi cha rehema. Wale ambao wameingia katika makaburi yao walipimwa na kujaribiwa, ili kuona kama wangeweza kutambua wajibu wao wa kumtumikia Mungu. Shauku ya kumtukuza Mungu inapaswa kuwa ndiyo msukumo mkubwa sana na wenye nguvu kuliko yote. Inapaswa kutuongoza kufanya bidii katika kuboresha fadhila na fursa tulizopewa, kutumia kwa hekima mali ya Bwana. Inapaswa kutusaidia kutunza bongo zetu, mifupa na misuli yetu katika hali ya afya njema, ili nguvu zetu za kimwili na usafi wa kiakili viweze kutusaidia kuwa mawakili waaminifu. Matakwa ya kibinafsi daima yatiishwe; kwani kama yakipewa nafasi ya kutenda kazi, hupunguza uwezo wa kufikiri, kufanya moyo kuwa mgumu na kudhoofisha nguvu za kimaadili...

Danieli aliheshimiwa na Bwana *kama mwanadamu*, kwa sababu alikuwa wakili ambaye alitumia kwa uaminifu mali ya Bwana Wake. Hakumsahau Mungu, bali alijiweka katika njia ya nuru, ambapo aliweza kuwa pamoja na Mungu katika maombi. Tunasoma kwamba Mungu alimpa Danieli na wenzake maarifa na ujuzi katika elimu na hekima yote...

Kila mahali utakapokuwa hebu wote wanaokuzunguka watambue kwamba unamtukuza Mungu. Hebu ubinadamu ufichwe; na Mungu aonekana kama tumaini pekee kwa wanadamu. Kila mwanadamu anapaswa kujenga tabia yake katika mwamba wa milele, Kristo Yesu; ndipo itastahimili katikati ya dhoruba na pepo.

Mungu ataziandaa akili zetu kumtambua Yeye ambaye peke yake anaweza kuisaidia nafsi inayopambana na kushindwa. Wale wote wanaosimama chini ya bendera Yake atawafundisha kuwa mawakili waaminifu wa neema Yake. Mungu amempa mwanadamu kanuni zinazodumu milele, ambazo kwa hizo kila nguvu ya kibinadamu lazima siku moja itasujudu. Ametupatia ukweli kama amana. Mwali wa thamani wa nuru hii usifichwe chini ya pishi, bali uangazwe kwa wote waliomo ndani ya nyumba. Kweli, kweli idumuyo milele, inapaswa kujulikana. Waoneshe wale unaokutana nao kuwa kweli inaleta mabadiliko kwako. Ina maana kubwa kwako kusimama katika kanuni ambazo zitadumu katika nyakati za umilele.

Mungu amempa kila mwanadamu karama, ili jina Lake liweze kutukuzwa, si kwa ajili ya mwanadamu kuhimidiwa na kusifiwa, kuheshimiwa na kutukuzwa, ilhali Mpaji anasahaulika. Wote tumekabidhiwa karama za Mungu, tangu aliye mdogo na fukara hadi kwa aliye mkuu na tajiri... Hebu asiwepo wa kupoteza muda aliopewa na Mungu kwa madai kwamba ana talanta moja. Tumia talanta uliyonayo katika kila fursa. Karama ni za Bwana, zinapaswa kurudishwa Kwake. Si mali yako mwenyewe umekabidhiwa tu, ni za Bwana. Siku moja atakuja kupokea kilicho Chake na riba Yake. Timiza kwa uaminifu utume wako uliopangiwa, ili uweze kukutana Naye kwa amani (*The Review and Herald, Septemba 12, 1899*).